

CREDO CALVINI.
SEQVAVM

MONASTE-
RII IN CELEBRI
GYMNASIO PAVLINO SO-
CIETATIS IESV IN GRATI-
AM CALVINISTARVM TER-
tio disputatum.

IN QVO CALVINI DE PRIMA-
RIIS FIDEI CHRISTIANÆ CAPI-
tibus partim manifesta, partim manifestis
rationibus ex eius scriptis deducta dog-
mata execranda propo-
nuntur.

Accessit hac postrema editione CONFU-
TIO VVorstianæ responsionis ad præfatiun-
culam, conscripta à Bernardo Dör-
hoff SS. Theol. Baccal.



MONAST. VVESTPHAL.

Typis Lamberti Rassfeldt.

ANNO M. DC VII.

Callegari
Bibl.
Calli
loc.
M. de Cocini
Secr.
Rom.
seja

121

Handwritten text, likely bleed-through from the reverse side of the page. The text is illegible due to the quality of the scan and the nature of the bleed-through.

D.

O.

M.

ILLVSTRISSIMO PRINCIPI AC DOMINO D. PHILIPPO de Croy Comiti de Solre Marchioni de Ren-
ti equiti aurei velleris. Regiæ Maiestatis, &
Archiducis Alberti in rebus Status & Belli
Consiliario, & prouinciarum ac ciuitatū Tor-
nacenſis & Tornesiſ &c. Gubernatori &c.

Domino nostro clementissimo.

Annate & perannate.

TRes primos Caluinisequarum fidei articulos,
PRINCEPS ILL^{me}, &c. offero xenium.
quàm Excellentipietate tua indignum; tam nulli alte-
ri, quàm Illust^mz humanitati & generosa sapientia
debitum. Vt singularis & eximia pietas infandu Cal-
uini, sequaciumq; eius atheismi interturbaretur, om-
nino videbatur indignum; vt tamen incredibili huma-
nitati, cum in alios, tū in Scholas nostras, quas illustri
presentia tua nuper collustrasti, aliquod memoris ani-
mi reponeretur indicium, apparebat debitum. Nec al-
liud simul occurrebat aptius, pro ea, quā cœlitus in Ca-
tholica & Romana religione illustratus es sapientia;
quàm **CREDO CALVINIANVM**. vt quos ho-
stes felicibus armis persequeris; eosdem Catholicis in
Scholis iugulatos suis ipsorum gladijs, nefandisq; bla-
sphemijs intuearis. adeoq; agnoscas, allatā in Indias
religione Romana, numen Calecutanum, siue Diabo-
lum inde pulsum, Deum in Europa factum Caluinia-
num. Vale PRINCEPS ILL^{me} & chartaceam
hanc strenam boni consule. Dat. Monast.

VVestph. Kal. Iun. An. 1607.

PRÆFATIO AD LECTOREM ET BREVES

A D SPARSA MENDA-
cia Vindiciæ.



AM quartum in gratiam tui, Lector beneuolè, recuduntur hi tres primi Credo Calvinisequarum articuli, idq; nunc per modum libelli, vt hoc facilius eos circumferre, & quoties libuerit voluere ac reuoluere possis. Neque enim laborandum est magnopere de nonnullis verbi Ministris, qui plenis eos mendaciorum calumniarumque plaustis obterere, simulque Iesuitas tanquam horum parentes omnium criminum reos traducere per ora vulgi, connituntur: imitantur in hoc illum, qui rogatus cur omnibus malediceret, quia, inquit, malè facere ijs non possum. Oportebat à diuersis vocatos inuitatosque ad disputationem, semel iterumque eorum gratia resumptam aduolasse, & coram in arena Scholastica syllogistico è scripturis sacris apparatu decertasse. Sed quia malè se facere Iesuitis disputando non posse videbant, ijs maledicere Prædicanticè, id est, impotentissimè impudentissimeque non cessant. An enim impudens non est conuitium à Iesuitis orthodoxos Christi fideles ad mortem raptari? ab ijs omnes dissentientes etiam principes aperta vi infestari? per eos Gallia

An-

Angliæque reges ad cædem designari? Præinnato sibi stupore vecordiaque soli necdum intelligunt Prædicantes, quod tota Europa iam lippis & tonsoribus est notissimum, nunquam magis, quam hoc ipso tempore Iesuitas in Gallijs aut floruisse, aut suæ innocentiae luculentius maiusue testimonium accepisse. Neque enim tantum infamis illa & mendax pyramis. Calvinistarum opera studioque Parisijs erecta & inscripta, penitus est eversa, sed & Collegia ex quibus Hugonottorum artibus fuerant exturbati, sunt reddita, & (quæ Dei super innocentes benedictio est) noua insuper, regiâ planè munificentia, cõdita; idque ab illo ipso Rege Christianissimo, in cuius eos caput mentiuntur coniurasse. Non potest Societas I E S V vno aliquo verbo in Europa magis deprædicari, quam Regis regniq̃ Galliae commemoratione, & ab hac illi, amentes odio, verbi Ministri eam sperant se posse calumniari? Sed nec Angliæ mentio aliud innuit, quam palæstram inter alios etiam Societatis hominibus datam, ad zelum in religione Catholica promouenda ostendendum, ad constantiam in ea ad extremum vsque vitæ tuenda declarandam, ad innocentiam à conspirationibus in magistratus supremos conseruandam. Ecquidenim? Illi ipsi coniurati clam, palam; extra & inter quæstiones suppliciaque grauissima tantum abest

PRÆFATIO

vt Iesuitas aliquid machinatos in regem dixerint, vt etiam se timuisse ne si coniurationem resciscerent, impedirent, asseuerarint. Nihil de Iesuitarum conspiratione liber Anglicè & in ipsa Anglia publicatus coniurationis historiam supplicijque describens, nihil de eorum consilijs libellus ex Anglico sermone in Latinum translatus, & Londini excusus, cuius inscriptio Series detectæ nuper coniurationis, Nihil illi insertæ confessiones Thomæ VVineri & Fauckij, nihil denique ipsius regis Britannia oratio habita 9. Nouembr. in ordinum conuentu, de Iesuitarum molitionibus proditiõibusque commemorat. Purgant Iesuitas coniurati, ex quibus solis, si quid suggererant consilij, cognosci poterat, non accusant eos coniurationis historiam in Anglia de tota conspiratione scriptam, ne leuissimam quidem de ijs Rex suspicionem mouet: & adhuc amplius quid pro innocentia Iesuitarum contra Caluinianos in VVestphalia Corybantas desideremus? non est huius instituti multis hæc prosequi, illud tamen præterire non possum; Elizabetham Angliæ Reginam ANNO 1584. VVilhelmum Critonum è Societate I E S V sacerdotem coniecisse in Londinensem carcerem Sed vbi ex confessione alterius cuiusdam Rei nomine Parrij didicisset Critonum ipsi scelus in

Regi-

Reginam meditatam dissuasisse, idemque ex
 Epistola Critoni hac ipsa de re scripta 10. Ex collect.
 Kalendas Martias perspexisset, & Crito- rum me-
 num vt innocentem eximi è carcere, & lite- morabiliū
 ras eius typis exprimi spargique per regnum gestarum
 iussit, Iesuitas inquiens audire vulgo malè, tempore
 sed velle & facere regibus bene, nec insidiari fœderatæ
 sed patrocinari sibi & summatū capitibus ac vnionis
 fortunis. Non addam dictis artes Caluini- vol.1. pag.
 sticas in optimis Galliarum regibus diue- 66.
 xandis, non intentatam illi ipsi Britannæ
 Regi (quem ijs obijciunt) necem Anno Mercurius
 1600. ab Alexandro Ruueno eiusque fra- Gallobelgi
 tre vtrisque admodum Caluinianis. Pos- cus tom 4.
 sunt hæc pluribus illustrari. Sed quid opus anno 1600.
 soli lumen mutuari & quæ vel cæcis sunt con-
 spicua declarare? Mirantur homines pruden-
 tiores istos semiuerbios adeo depuduisse, vt
 non vereantur obiectare Iesuitis Principum,
 oppidorum & ciuitatum prodiones, qua-
 rum illi ipsi vel maximè sunt rei, vtpote om- Vide thea-
 nis perturbationis, belli, crudelitatis nostra trum cru-
 ætate inuentores. Illa enim quam inculcant delitas
 & obijciunt Gallia multis truculentia Calui- Caluinisti-
 nianæ etiamnum redundat vestigijs. cæ.
 Quæ-
 nim sunt à quibus viginti millia templorum
 in Gallijs excisa? Caluinistæ. Qui sunt qui duo
 & quadraginta millia Sacerdotum siue cleri-
 corum ibidem vno Anno 1562. diris suppli-
 cijs excarnificatos extinxerunt? Caluinistæ.

Qui

P R A E F A T I O

Qui infantes per matrum viscera iugularunt? qui matrum virginumque corpora inserto vteris tormentario puluere, horrendum dictu, foedissimè disploserunt? Caluinistæ. Qui sues ad discerpenda martyrum intestina, inspersa in apertum ventrem auena, adegerunt? Caluinistæ. Denique qui earum cladium parentes fuerunt quibus, vt Colignius Hugonottus testatur, decem annis vix integris vicies centena millia Gallorum ceciderunt? Caluinistæ. Mitto cetera quorū in Epistola sua ad Vorstium exarata quidam de Societate IESV meminit. Quis vero hic dubitet quin hæc Deo Caluinistico obdurante, excæcante, inculcante, instigante, applaudente, cribrante, clauum tenente, & instrumenta sua dirigente gesta sint omnia? omnia inquam, nam ab illo omnis emanat efficacia erroris, ille opus latrocinantiū belluarum potius quā hominum suū opus esse declarat. Vidit Deus cōdito mūdo q̃ omnia erāt valde bona: dedit & operam Deus Caluinistic' vt omnia quę fecerat essent valde bona. Vidit nimirum zelosissima latrocinia, religiosissima sacrilegia, strenuissimas tyrannides, liberalissimas deprædationes, & castimonialium sacras constuprationes. Non sic Deus Catholicorum non indurat positiuè non item positiuè excæcat (qua acceptatione indurationis & excæcationis malitiosè dissimulata, primam primæ thesæos rationem

nem

nem mendacium esse Sathanicum impudenter exclamat Apologetes) Non operatur, inquit B. Augustinus lib. de prædestinat. & gra. cap. 4. Deus in homine ipsam duritiam cordis, sed indurare eum dicitur, quem mollire noluerit. Sic etiam excæcare quem illuminare noluerit, & repellere eum quem noluerit vocare & alibi. Non obdurat Deus impietate malitiam sed non impietate misericordiam. Hæc Catholicorum mens est satis in disputatione explicata, ut proinde parum prudentis sit re aut neglecta, aut malitiosè intellecta tragicè tumultuari. Quod si vero Deus Calvinisticus per suos filios prædestinatos res illas longè optimas in Gallia inculcavit, direxit, peregit, clauumque tenuit, vide obsecro Lector quo iure, qua fronte Galliam Iesuitis obijcere audeant Calviniani. Videat quoque Deus & iudicet. Non enim ad homines solum spectat illa calumnia, Sed in Deum ipsum manifesta redundat impietas. Is Tartarea fuligine ab his deturpatus in cacodæmonem, eius sædè laniata religio, diruta templa, eiusdem combustæ, confractæ; raptatæ, dilapidatæ imagines, ut in nulla eorum ecclesia vestigium appareat crucifixi; honos nominis Iesv interdictus, ut nemo pileum capite impunè mouerit, quin litigaturo stomachum moueat Prædicanti. Nihil ego de multis alijs præposteris reformationibus

P R A E F A T I O

mationibus Calvinisequarum in Catholicis ecclesijs dicam, quarum apud Catholicos imitatores, vt sacra quædam anathemata, cæsareis legibus appenduntur. Aequum est Candide lector vt qui quæ vult dicit, quæ non vult audiat: æquius vt susurronum ac detractorum manifestis occurratur calumnijs; illud porro etiam necessarium, vt publicæ criminationes publica censura retundantur. Igitur, vt vna omnium Catholicorum voce loquar, gaudeamus in tanta hæreseon & errorum varietate (quos Hedio Zvvinglianus in epistola ad Bezam cōqueritur emeruisse ferè 128. qui tamen à multis pro verbo Dei venditentur) illam adhuc manere fidei Catholicæ constantiam, illam etiam quantacunq; est, pacem: Hanc Societas Iesu à multis iam annis libris doctissimis, iuuentutis laboriosa informatione, solidissimis disputationibus, molestijs innumeris, vitæ exemplo & castimonia, accuratissimo religionis instituto, summa ad omnes errorum irreptiones vigilantia protegere ac tueri visa est, vt cum alijs feruore & conatu facile certare possit. Quos viros etli Conradus Vorstius pro ea qua est multipliciter constrictus ignorantia (vti in epistolis eius videre est) præferuidum vocet Monachorum genus, nos tamen cum Concilio Tridentino nō vt Monachos, sed vt selectissimæ religionis & Societatis clericos, præferuidos nostros

stros defensores, in quorum fama nulla unquam mendacij adhæserit macula, completimur. Et quod nō solum pietatis sed & gratitudinis officium est nullum in illos telum calumniæ iaci aduertimus, quo non respublica Christiana æquè tangi pulsariq; videatur. Quod si vero quorūdam inuidorum sermunculis se traduci intelligant, non ideo de re-pub. bene mereri, aut diligentiam suam acuerre fastidiunt, sed vanissima fortunæ ludibria alta mente despicientes in virtutis ac literarum exercitatione conquiescunt. Idque potissimum in lucro ponunt de toto orbe Christiano optimè semper mereri, benefacere omnibus, ipsos etiam hostes in quorum errores cum ratione efferuescunt ad saniora prolicere consilia, & in Ecclesiæ auitæ gremium peramanter reponere. Superest nunc vt eorundem in mendacijs affingendis libidinem verbo detegam. Vnum enim si nōris omnia noueris. Ita simili planè sunt argumento. Admodum quiritantur in disputatione Apologetica, quam mihi non nisi obiter inspicere licuit, vtpote iuris alieni, imperfectā adhuc, acephalā & 4. mendacijs admodū insignem, iuxta ac infamē. quod ipsos Iesuite dicant esse Calvinisequas. quod ipsorū fidem appellent Credo Calvinisequarum. quod omnes Ecclesias reformatas vocitent Caluiniānas. Et hoc primum Iesuitarum faciunt mendacium.

Sed

PRAEFATIO

Sed te obsecro Lector, tu iudica, vtrum ne faciant intelligendo vt nihil intelligant; quæq; nusquam scripta sunt mendacia vt scripta arripiant. Legi, relegi, expendi, conuerti ex Latino in linguam vernaculam disputationem totam, & nec vel vnum gry deprehendere potui quo hunc illūmve Prædicantem Calvinisequam indigitârint, vel illius fidem idem esse quod Credo Calvinisticum, innuerint. Sed vniuersa vniuersim posita comperi, demonstratumque quid ijs qui Calvinum sequuntur de tribus fidei articulis sit sentiendum. Nec volunt, nec si velint possunt Iesuitæ Prædicantium fidem depingere, vt quos Protheo videant in suis opinionibus mutabiliores, intelligantque Libertinos; qui in nullius verba, Doctorisque de sensu scripturæ sententiam iurent, sed facili momento euanidis somnijs & ludibrijs Spirituum (albi atrii sint parum interest) in alias atque alias sectas abripiantur. Quod si Calvinum non sequuntur, vt aiunt, quid sibi Credo hoc ascribi mentiuntur? pro Calvinisequis adornatum est, in quibus si non sunt ipsi, nihil ad eos prorsus spectat. Statuantque licet, non esse cur Calvinum contentiosè defendant, aut quasi eo egregiè defenso & propugnato glorientur. Quod si vero ipsi etiam cum Caluino victi victorias flare audeât, noueris quod ait Tertullianus lib. de præscript. hæret. cap. 15.

hære-

AD LECTOREM.

hæreticos etsi vincantur nunquam tamen
vinci. Quid ita? quia semper superiores esse
consueverunt mentiendi libidine & impu-
dencia. Sin autem Calvinum sequuntur, non
per Iesuitas, sed sua ipsorum placita Caluini-
sequæ constituuntur, suisque indicijs vt fori-
ces in vulgus agnoscuntur. Habes primum
quod statuunt mendacium Iesuiticum, ex
quo de reliquis potes iudicare. Illud tamen
præterire non possum quod pro sua illa syn-
ceritate prædictorum mendaciorum artifex
ita candidè scilicet in Bellarmino versatus sit
vt dignissimus sit cui posthac nullū vnquam
verbum non à prudentioribus viris tantum
sed ne à minimo quidem discipulorum cre-
datur. Virum videlicet incomparabilem
Bellarminum & grauissimum huius sæculi
doctorem mendacijs suis malitiosè onera-
uit. Rideres ranam hanc Aesopicam in enar-
randis erroribus Bellarmini inflari vt cre-
pet. Ego interim in hoc meam fidem tibi ob-
ligo, quod è Caluini Institutionibus in octa-
ua Geneuæ in officina Francisci Perrini An-
no 1569. impressis nihil sit circa articulos
Caluinisticos citatū, quod à meipso nō sit ibi-
dem inuētum, vt proinde merito rideas men-
daci loquentulos istos, qui distitant Caluino
multa affingi, quæ in ipso non reperiuntur,
aut si reperiuntur quod huiusmodi à Pontifi-
cijs veteratoriè interferantur. In notis, Si
quid

quid aberratū non fraudi Authoris sed Chalcographicis demutationibus, impressionibus diuerſis, alienis non à re ſed loco citationibus condonet ingenuus & candidus veri Lector. Vale lector & hoc illuſtre mendacium Caluini lib. 4. Inſt. cap. 7. §. 27. expende, & an vllum vnquam impudentius legeris, quam ſit illud quod ſequitur triplex attentè conſidera.

Quaſi vero dubium ſit qualem religionis ſpeciem profeſſi ſint iam pridem Pontifices cum toto Cardinalium collegio, & hodie profiteantur. Primum enim arcana illius Theologiae, quae inter eos regnat, caput eſt, nullum eſſe Deum. Alterum; quacunque de Chriſto ſcripta ſunt ac docentur, mendacia eſſe & impoſturas. Tertium; doctrinam de futura vita & vltima reſurrectione meras eſſe fabulas.

RESPON.

RESPONSIONIS VVORSTIANAE AD PRAE- fatiunculam Confutatio.



ADIDERAM præfatiunculam breuē Credo Calvinisequarum, in qua primum quaternionem recentē è prælo allatum refutaram. Pupugit ea res Prædicatē proximum, qui illiē admonitiunculam ad lectorem conscripsit, sed ita mutilam & imperfectam, vt in vernaculo eam reddere puerit. Fecit igitur aliam quadruplo, si folia spectes, longiorem, vt Quadruplatorem facile agnoscas, & secundum mendacijs pectus? At quid in ea? omnes quæ in ventoso & mendaci farcimine possunt esse farturæ. puta, mendacia, calumniæ, venti & inanis gloria.

§. I. Primo ais, quod Iesuitæ ad tuas disputationes se venturos promiserint; in quo spiritus illius, albi an atrī nescio, somnijs illus tuis auditoribus egregiē imponis. Deinde vt Cretenses se nescire mare; ita tu metiris quod te venturū nunquam Iesuitis spopoderis. Recordare enim mecū epistolicū tuum certamē, in quo ne causæ tuæ diffidere putareris intumescēs spiritu Calvinistico aduersarijs respondisti. Veniam fortasse ad vos aliquādo præsertim vocatus, & animū diuinæ gloriæ vestræq; salutis percupidum ostendam. Num venisti,

Voca

vocatus, desideratus, appromissus duodecimo post primam disputationem die. O Thra-
sonem! ô sumiendum fumo dignum, Cōue-
nerat vt mōtes hos parturire videret frequens
auditorium; parturiebat nemo nisi quis forte
nascebatur ridiculus mus. Itaq; spe omnes lusi
subrisimus. Afferit interim æquè constanter
prædicans nihil tale sibi à Iesuitis posse obie-
ctari. Loquitur prædicantice, nihil est noui.

§. 2. Secundo vis à Iesuitis orthodoxos ad
necem raptari. Sed nisi propitium Aeolum
habueris actum est de his tuis fumis. Inspi-
ciamus enim quem citas hanc ad rem Bel-
larm. qui libro 3. de laicis cap. 21. sic loquitur.
*Ioannes Hus, Lutherus, & Donatista docuerunt non
licere hereticum incorrigibilem tradere seculari
potestati ad puniendum & comburendum. Contra-
rium docent omnes Catholici, & aliqui ex hereticis.
Nam Calvinus posteaquam Michaelē Seruetū tan-
quam hereticum publicè supplicio extremo affecisset.
& ab alijs sectarijs argueretur, libellum edidit, in
quo demonstrat licitum esse in hereticos gladio annu-
aduertere. Benedictus quoq; Aretius in historia de
supplicio Valentini Gentilis, eundem Valentinum ob
hæresin iure casum à Bernensi magistratu contendit.
Fusius vero id ipsum docet Theodorus Beza in lib. de
hereticis à magistratu puniendis. Hactenus Bel-
larm. Ecce tibi homo effrons inculcat idem
Calvinus, monet Aretius, testatur Theodo-
rus Beza primarij è Calvinistis, Catholicorum*

VVORSTIANÆ AD PRÆFAT.

tum omnium vna est vox & sententia. Et tu huius sententiæ veluti solos authores & doctores Iesuitas, summi sceleris arguis? Si non peccauit tibi Calvinus ille tuus pius Ecclesiastes, vt ais, eundem cum ipsis lapidem mouendo, quomodo Iesuitæ idem docendo offenderunt? Tu scilicet Caluino, Aretio, Beza, iudiciosior, ingeniosior, doctior nihil quid illi dicant curabis, & in solos Iesuitas te transuersum cæca rapiet inuidia? Recognosce iterum verba Bellarmini sequentia. *Nos igitur ostendimus, hæreticos incorrigibiles, ac præsertim relapsos posse ac debere ab Ecclesia reijci, & à secularibus magistratibus temporalibus pœnis, atque ipsa etiam morte multari.* Quid si hoc idem totidem verbis de sua Calviniana Ecclesia affirmant Calvinistæ? Tenentur eorum libri, testata satis est verbis iuxta ac factis eorum doctrina. Quid ergo tecum incipiam aselle, nisi vt prius te ad scholas ablegem, quo magistrorum tuorum perdisceas sententiam, & videas quæ in Seruëtum & Gentilem constituerunt supplicia. Dicam quod res est. Furor & inuidia hoc loco tuam garrulitatem acuebant, non e mentitus veri amor. Tantum enim tibi & tuis symmisti in Iesuitas est odium, vt si id tibi per vires liceret vel omnium carnifex esse optares.

§.3. Veniamus ad reges & principes, & num ea sibi constent, quæ de eorum nece veterator inuidus blaterat, videamus. Vim, in-

A

quis,

CONFUTATIO RESPON.

quis, Regibus intentant Iesuitæ. Huius rei quosnam testes habes? 1. Mendacissimam ex Anglia Galliaque famam, quam inchoarunt maleuoli prædicantes. secundo, trium schedarum Ingenuæ orationis, Narrationis fidelis, & Admonitionis fidelis authores. Quos? quales? viros an fæminas? ingenuos an scurras? veraces an mendaces? nihil horum in-

Vide Phi-
lippica Ia-
cobi Silua-
ni,

nuit. Sed tu tamen dic obsecro, quales? Vni-
co verbo, mendaciorum pudendorum ar-
chitecti, quibus propter constitutiones im-
perij in famosos libros timor fuit nomen su-
um apponere. Hos tu nobis testes obtrudis
stolide accusator? At saltem exemplo nos op-
primes. quo illo? Henricum 3. Iesuitæ inter-
fecerunt. per quem? an Pultronium aliquem
subornârunt? an suo è collegio vllum submi-
serunt? mentire audacter, erit delira vetula
quæ credat & ingemiscat.

§. 4. Pergis ineptire. Hic, inquis, nihil il-
los iuvant, quæ pro illis affert Baccalaureus de
florenti illorum statu in regno Galliæ. Inno-
centiæ ô Deus vberrimum das testimonium,
tibi gloria. Vis dicam prædicans quid pro-
fit? Nimirum vt dum illam publico in foro
columnam, publicum totius Galliæ pro So-
cietate Iesu testimonium, publicam magnifi-
centissimamq; gratulationem factam Regi ob
Societatem merito restitutam, videt Caluini-
sta, irascatur, ringatur, rumpatur. Quid vero

ad te

VVORSTIANAE AD PRAEFAT.

ad te mediterraneum, syluanum, Lythophorum Veneti peninsulani? Abierunt ab ijs Iesuitæ, eiectioni non sunt; voti sui facti Rom. Pontifici rationem habuerunt, flagitium quod tacite insinuas non admiserunt. Quid in his venenose arance culpas, quid insectaris?

§.5. Negas quæ à me hoc loco historicè ad defensionem Societatis inserta erant ex libris in Anglia impressis. At quibus authoribus? prorsus tenebrionibus & quos è bacchanalibus Calvinisticis laruos reproducis: Scilicet Orationem Ingenuam, Narratione fidelem, infideles testes.

§.6. Dixeram quod ferè concedis à Calvinianis tuis 20. millia templorum in Gallijs excisa. 42. millia Sacerdotum siue clericorum vno anno 1526. miris modis excarnificata: Infantes per matrum viscera jugulatos: matrum virginumque corpora inserto vteris tormentario puluere, horrendum dictu fædissimè displosa. Martyrum intestina apertis corporibus suis in pastum data. Nequitiam & tyrannidem tantam vt 10. annis vix integris, teste Colignio tuo vices cetera millia Gallorum ceciderint. Flagrante Marte hæc gesta affirmas. Itaque vt video nihil aliud euici, nisi Calvinistas modo Marte flagrante ista patrent innocentes esse: reos autem Iesuitas, qui nō modo furente Marte, sed ne pace quidem vnquam vllum mortalium in

CONFUTATIO RESPON.

causa sanguinis iudicialiter accusarunt (nulli enim Ecclesiastico in causa sanguinis aut iudicem aut accusatorem esse licet) ne dicam ad mortem raptarunt, ut tu inuide prædicans mendaciter debaccharis. Quæ autem à Catholicis magistratibus contra tuorum machinationes gesta sunt extra bellicos furores, non solum ratione ipsa, sed & tuorum præceptorum ad stipulatione confirmata contra tuos latratus immota persistent. Sed nihil hæc ad Iesuitas, quos tu solum reos esse volebas. Hic tu me ad Martyrologium Caluinisticum remittis, sed ego te vicissim ad theatrum crudelitatis Caluinisticæ accerso. Scio tamen nihil tuo palato sapere nisi sordes Caluinisticas. Relinquamus eas tibi ut habeas in quo triumphes.

6.7. Visne tibi præposterarum tuarum & tuorum prædecessorum Calvinoprædicantium reformationes dicam? Non dicam ego, dicet homo doctissimus & integerrimus natione Anglus Thomas Stapletonus in promptuario morali in Dom. 7. post Pentecost.

Mutata est religio Christianorum, vel vtheretici nostri loquuntur reformatæ est, &c. Mutata est ab illa in qua pisces fiebant Apostoli, laici fiebant clerici, & seculares facti sunt religiosi; ad illam in qua Apostolorum successores fiunt Apostata, clerici non distinguuntur à laicis,

laicis, religiosi redeunt ad saeculum, atque adeò redire coguntur, vel certè redeuntes laudantur. Ab illa quæ orabat pro defunctis fratribus, ad illam quæ omnia pro defunctis orandi collata subsidia, instituta collegia, constructa monasteria, expilauit. Ab elemosynarum largitione, ad Xenodochiorum subuersionem. A vita claustrali, ad luxum aulicū. A voto castitatis, ad monachorum connubia, id est adulteria approbata. A velandis virginibus ad stuprandas matronas. A vinculo thori cōiugalisis ad frequentia diuortia, & superinductas vxores, id est, concubinas domesticas, superstitere relicta. A voto paupertatis ad professas & legibus probatas vsuras. Ab obedientia voluntaria, ad arrogantiam affectatam effrontem & effrēnem. A paucorum superstitione, ad impietatem communem. Ab hypocrisis quorundam ad iniquitatem iactantiam: vt qui antea castitatem simulabat, inter adulteros esse castus erubescat. A certis ieiunijs ad perpetuam ingluuiem & carnis curam in

A 3 desi-

desiderijs. A precibus Ecclesiasticis, ad prædicationes laicas. A concionibus doctorum, ad lecturas adolescentum & muliercularum. A memoria sanctorum, ad reliquiarum exustionem. A peregrinatione, ad loca sancta, ad frequentanda lupanaria. A timore & tremore, quo iubet nos Apostolus operari salutem, ad certitudinem & presumptionem, quam docet Calvinus, timore vacuam. A studio virtutis, ad contemptum peccati. A verecunda peccatorum confessione, ad gloriantium in rebus pessimis. Ab illa religione quæ omnes hæcenus hæreses damnavit, ad illas sectas, quæ omnes ferè veteres hæreses resuscitârunt: Ab Ecclesia visibili, notissima, illustri, & supra montem posita iuxta Scripturas, ad latitantem in deserto, & fugitivam meretriculam, iuxta misera paucorum perfugia. Ab illa cuius sunt certa & firma fundamenta, ad illam cuius totum fundamentum suus cuique animus est: qui illud in scripturis & Ecclesiæ dogmatibus quod volunt credunt, quod nolunt non credunt, ideoq;

ideoq; nec scripturis nec Ecclesiæ, sed sibi ipsis credunt, & vt ait Irenæus, semetipsos prædicant. A voce interpretantis Ecclesiæ, ad sensus scripturæ cuiusq; priuatos & proprios. A verbo Dei integro, ad textus corruptos. Ab vna versione Catholica, ad innumeras nouas. A patrum consensu, ad patrum contemptores vel corruptores. A iugi sacrificio, ad abominationē desolationis. A cultu præsentis Christi, ad horrendam idololatriæ Christianæ calumniam seu blasphemiam potius. A fide & bonis operibus, ad solam fidem iustificantem & saluantem. A studio merendi vitā æternam, & violenter rapiendi illam, ad doctrinam præsumendi eam, & absque certamine coronam adipiscendi. A mandatorum obseruatione studiosa, ad doctrinam de impossibilitate obseruandi ea. A libero arbitrio, ad necessitatem peccandi. A reuerentia sacerdotum, ad occisionem eorum. A consecratis & ornatis templis, ad demolitiones eorum. A veneratione sanctorum, ad eorum statuas deturbandas.

A legibus Ecclesiæ ad placita principum. A septem Sacramentis ad duo, vel tria, vel quatuor. A liturgia Catholica ad cœnas Calvinisticas. A sacerdotio ordinato, consecrato, & cælibe, ad ministerium politicum, profanum & vxoratum. Ab illa religione quæ sexum muliebrem & vtriusque sexus pueros ac iuuenes in modestia & verecundia metuq; maiorum continebat : ad illas sectas, in quibus nec pueri nec fœminæ quicquam erubescunt. In quibus videlicet naturali verecundiæ, successit impudentia; pudori virginali, effrons lasciuias; munditiæ, fucus; oculis demissis, elati & leues; paritati verborum, superba loquacitas; operi assiduo, lusus perpetui; acui & filo, chartæ & tripudia; libellis precum, cantilenæ amatoriæ; frugali parsimoniæ, luxus immodicus; rosarijs B. Virginis, plumulæ crispata, pectines, verriculi; erubescentiæ de futuris nuptijs, risus effusi de rebus venereis. Hæc iuuentutis in Anglia (postquā hæretica esse cœpit) mutatio facta est. A metu peccati ad verecundiā

iustitię, vbi scortatores fiūt, ne Papistę
videātur, vt in Anglia hæretica. Pluri-
ma breuitatis causa omitto. *Addo e-*
go ab ea religione, quę nomen Iesu
aut aperto capite aut corporis incli-
natione veneratur, ad illam quę id vel
irridet vel prohibet; vt nunc factita-
tur in Palatinatu. Ab illa in qua Chri-
stiani crucis formatione Diabolos
fugant, ad illam in qua captiui Diabo-
li crucis formationem subsannant,
multo minus vsurpant. Ab illa quę
bona opera laudat ad illam, quę om-
nium iustorum opera peccata nomi-
nare non erubescit, vt tuus Calvinus.
Ab illa Ecclesia quę sacra in templis
altaria habuit, iugemquę Christi ante
oculos etiam in imagine præfixi me-
moriā, ad illam, quę sic omni Chri-
stiano ornatu templa sua nudauit, vt à
Turcicis delubris nihil iures differre.

Habes hic non tam meum quam
Stapletoni de tuis fœdissimis refor-
mationibus Catalogum, quas si placet
exceute. Est vir ille in suāmet patrię
miserijs deplorandis testis incorru-
ptus.

§. 8. Quod Iesuistas Monachos appellasti ignoscemus ignorantiae tuae; cui mox malefani cerebri figmentum adijcis, quali quævis vota paupertatis, castitatis, & obedientiae monachum faciant. Hæc mera tua est ignorantia, necdum didicisti inter vota distinguere. Bellarminum falsò citas, ut soles, & rationem Monastices ab illo assignatam cap. i. malitiosè dissimulas. Sed non est opus proijcere margaritas ante porcos. hæc tibi sufficiunt. Quod autem de eorum laude dixi, dico, dicamque quoad viam (etsi tu crepes invidia) nullum esse religiosorum in orbe Catholico genus, cui propter vitæ præcipuam integritatem & exoticam eruditionem libidinosorum prædicantium genus infestius sit, quam est sancta Iesu Societas. Et quia tibi spina in oculis sunt nõ cessas instar rabidi canis in eorum famam grassari. Hinc illam maligni pectoris mephitim exhalas, dum eos orbis terræ principatum affectare cõminisceris. Deum, diuos omnes, Europam, orbemque nouum testor te post natos homines impotentissime impudentissimeque mentiri. Hæc tibi commenta sola inuentrix extorsit inuidia.

§. 9. Quod de inconstantia prædicantium inferui id nihil nouum est, quando enim cuius licet sacram Scripturam suo arbitratu ut cereum nasum trahere ac flectere (quæ vnica hæreticorum regula est) quid mirum quot sunt

VVORSTIANAE AD PRAEFAT.

sunt capita tot oriri sententias? vbi ad nullius magistri verba certò respicitur, deliratur verius quam cogitatur quomodo constantia doctrinæ inueniatur.

§. 10. Ad Bellarminum venio inuictissimum, vt scripsi, Ecclesiæ Apostolicæ propugnatores, quem si Dijs placet consarcinato Pontificiorum errorum indice refutauit. Quibus argumentis? nullis, qua forma? sua illi figmenta appingendo. Ecce vnum è multis. Quæstio est inter Catholicos, & hæreticos, an toto cap. 6. D. Ioannis agatur de Eucharistia nec ne. Bellarminus respondet negatiuè lib. 1. de Eucharistia cap. 5. versu. 11. in maiori editione.

Quantum ad primum non est controversia, an in toto capite agatur de Eucharistia: constat enim non ita esse.

Vorstius vero Bellarminum sic citat in Enchiridio suo affirmatiuè.

Christus in concione illa, quam habuit Ioannis 6. non nisi de Eucharistia, de q. Sacramentali manducatione corporis & porione sanguinis perpetua differit. Bellar. ibid. c. 5. 6. 7.

Et cum tam insigniter mentiaris, peierare tamen hisce verbis non times. Ich bezeuge hier mit für Gott und aller Welt/ daß ich ihm seine meinung im geringsten pünctlich wissenschaftlich nicht verändert habe. Sic diem in noctem, album in nigrum vertas. licet & periures nihil abs te mutatum.

§. 11. Festu-

§.11. Festucam in alienis & trabem in oculis tuis non vides. Errata carpis typographica quibus ipse abundas, & non vides opus tuum nihil esse nisi continuum errorem, mendacium, calumniam?

§.12. Videamus nunc ut Apologetes nec eximius nec probæ fidei: Calvinum Ecclesiasten tuum, grauiissimis & trabalibus mendacijs expedias. *Ad homines*, ait Calvinus, si veniamus satis scitur quales reperturi sumus Christi Vicarios, Iulius scilicet, & Leo, & Clemens, & Paulus Christiana fidei columnæ erunt, primiq; religionis interpretes, qui nihil aliud de Christo tenuerunt, quam quod didicerant in schola Luciani. Sed quid tres aut quatuor Pontifices enumero? Quasi vero dubium sit, qualem religionis speciem professi sint, iam pridem Pontifices, cum toto Cardinalium collegio & hodie profiteantur. Primum enim arcana illius Theologia quæ inter eos regnat caput est, nullum esse Deum. Alterum, quæcunq; de Christo scripta sunt ac docentur mendacia esse & imposturas. Tertium doctrinam de futura vita & vltima resurrectione veras esse fabulas. Hæc iam pridem esse cæpit Pontificum religio. Interpretatur hæc de vita aliquorum Pontificum noster VVorstius, quasi Calvinus non loquatur disertim de doctrina in schola Luciani imbibita, quasi mendacium nō sit, inter eos non fuisse aliquos laude dignissimos, quasi non alia sit quæstio de cognitione, alia de operatione & vita. Sed confundat omnia hæc

VVORSTIANAE AD PRAEFAT.

hæc more suo VVorstico prædicans. Nos hac ratione non aliud concludemus, quam etiam atheum esse Calvinum utpote Sodomitam, quam atheum Bezam ut quem fuisse constet adulterum, quam atheum hunc nostrum prædicantem, ut qui se ostendat mendacem, iracundum, maledicum, quam deniq; Calvinistas atheos esse; ut qui prædentur, helluentur, volutentur in omni scelere, ac si non sit Deus, qui ea prohibeat.

Deinde si libebat tibi tam pudenda Calvini mendacia extenuare atque excusare, occur non etiam ea, quæ vel in Credo Calviniseq. vel in meis demonstrationibus, quod Calvinistarum Deus sit Diabolus, te inuenisse somnasti; cur inquam ea similiter non es conatus bene interpretari? maxime cum sanè intellecta, omnia sint verissima & suis comprobata rationibus. Mentitur tibi Lutherus, cum ait se sanctè hoc iuraturum D. Carolstadium non credere Deum esse in cælo. Non mentitur Calvinus dum quasi iurat & in suis Institut. hoc velut diuinum quoddam elogium ponit, Pontifices credere omnia quæ de Christo scripta sunt esse mendacia. Qua fronte qua conscientia ita ad arbitrium tuum omnia verere & pervertere non extimescis? credisne ceteros præ te fungos esse: ut prono assensu omnia tua pro Euangelij sint acceptaturi? Calvinus hyperbolicè est locutus, cur non etiam

iam Lutherus? Calvinus vitam respexit impiam, ut vis sed falso, pontificum, cur non etiam malam Carolstadij vitam respexisse tibi dicitur Lutherus? cur non vtrumque in pari causa vel absoluiſti, quando iam vni conſtitueras patrocinarī? vel eadē ſentētia (prout merebantur ambo) condemnasti? Sed nimirum Caluino ebrius homo, nil niſi thus, ut eſt apud Ariſtophanem, pedere Caluinum iudicare poteſt, ut planē ſimiles (quod in prouerbio eſt) habeant labra lactucas. Alioqui emundiorum narium viris plus quam hircū olent iſta: Pontifices cum ſuis credere, omnia de Chriſto eſſe fabulas, eos arbitrari, nec reſurrectionem nec Deum eſſe. Habent enim ij exploratum, adeo non fieri fabulam ex Chriſto, ut etiam ſanguinem cū vita pro Chriſto fundere Pontificij ſint parati, fundantq; etiamnum inter gentiles. Longe prudentius alij eſſe ſeſce Caluiniana reſpondent, ſe non omnia tueri Caluini dogmata, hominem eum fuiſſe & ut hominem aduerſariorum odio longius quandoque progreſſum eſſe, labi potuiſſe & lapſum eſſe. Sed huc deſcendere tibi non libet; times ne ſi Calvinus parens tuus mendacij conuiſtus concedatur, tu filius eius & patrenſis & tuis ipſius mendacijs onereris, cumq; tota Caluini doctrina exhiberis. Cui enim non ſit promptum, dato eo quod Calvinus in his ſit mentitus, ex emplō inferre Caluino

in

VOSTIANAE AD PRAEFAT.

in ceteris fidei articulis & scripturis explican-
dis etiam non credendum, eo quod mendax
hoc mereatur vt etiam vera dicenti non cre-
datur. Tu vide quam malam causam foueas,
vtq; solo te vlciscendi affectu, & in Iesuitas æ-
stu ac furore abreptus sis à veritate. Redi in vi-
am, quæ Christus est, & ad matrem tuam Ec-
clesiam Catholicam, à qua descisti reuer-
tere. Neq; enim alias habebis Deum patrem,
si Ecclesiam Romanam, nolueris habere ma-
trem Istud concors votum Iesuitarum: Hic &
non alius gladius aut minæ cōtra obstinatum.

IN DOCTRINAM CALVINI DE PRAEDESTINATIONE.

Caluini dogma est: aut calo, aut natus Averno es;

Quicquid agas calum te vel Avernus habet.

Qui leget hoc atrox Caluini dogma; caueto,

Ne ruat: incautus qui legit, ille ruit.

ALIUD.

Corueto gaudes Caluine sophismate: quare?

Corniger Europa primus adulter erat.

Perdere vis iterum; duo sumas cornua, quorum

ictibus ad Stygias corruat orbis aquas.

Aut inquis reprobat Deus, aut probat, alea iacta est.

Erustra immota Dei vertere fata studes.

Si probat; intrepidum turpi da pectus amoris:

Si reprobat; cassas, vt moriare, mori.

Luxuriare iubes, vel desperare, Sophista:

Fautorem stygij te patet esse louis.

Plato

Plato in Dialog. 2. de repub.

Modis omnibus pugnandum est ne Deus
qui bonus est, dicatur esse malorum causa,
nec qui iustis legibus victurus est verba hæc
dicat in sua ciuitate, nec alium loquentem au-
diat. Est enim & probitatis, & vitæ cōmunis,
& legum, & ciuitatum extrema corruptio.

IN CALVINI DOCTRINAM
quod Deus sit auctor peccati.

1.

*Abelis cadem; furias Davidis & ignes;
Perfidiam Iudæ, vult Deus: & Deus est?*

2.

*Quis Strygias metuat, Caluino iudice, pœnas?
Si Deus omne scelus conflât & ipse luet.*

3.

*Tu Caluine Dei, qui suadet Crimina, calum
Solutus habes; istius gaudia nolo Dei.*

4.

*Caluini audisset cum dogmatâ Tartarus; Et quid
Erigeo, cur tantis ignibus vrer? ait.*

5.

*Redde vicem merito, Caluino redde mihi ual
Lucifer: ipse nauum te facit esse Deum.
Reddo lubens; pœnas & Tartara, qua mihi restant
Ex æquâ mecum diuidet: hoc satis est.*

CRE.

CREDO CALVINISEQVAVVM

TRES PRIMI ARTICVLI

MONASTERII IN CELEBRI GYMNASIO Paulino Societatis IESV pridie Epiphaniæ Christi Anno clō IocVII. publicè ad disputandum propositi.

A. R. Domino M. Ioanne Bothorn

Theolog. practicæ studioso,

S. Lamberti Vicario.

ARTICVLVS APOSTOLICVS.

CREDO IN DEVM PATREM

OMNIPOTENTEM CREATOREM

COELI ET TERRÆ.



EV M hunc Calvinus sibi, suisq; sectatoribus transformavit in Diabolum, prout è schola Lutheri Heshulius *lib. de error. Cal.* è cœtu Calvinianorum Castalio

lib. de predest. è Catholicis Bellarminus *Tom. 3.*

lib. 2. c. 4. de amiss. grat. & pecc. Maldonatus in *ca.*

4. Matth. Becanus *Disp. an Deus sit author pecc.* diligenter obseruarunt ac notarunt. Res dictu

mira, sed probatu non difficilis: age enim qui

eadē DEVM specie ac fuligine depingit, qua

deturpatus Lucifer, ex Angelorum pulcher-

rimo degeneravit in inferorū omnium teter-

rimum, an non DEVM manifestè transfigu-

rat in Diabolum? At verò depinxit DEVM

suum, suorumq; Luciferi coloribus Calvinus.

Quid enim? Sathanæ illa in scripturis sacris

B sunt

Calvini
Deus Dia-
bolus.

* quod po-
fitive intel-
ligendum.
Cribrare,
tentare, fla-
gitia incul-
care pro-
prium est
Diaboli.

sunt lineamenta, ac notæ propriæ: hominum
mentes excæcare, *indurare, suisq; mendacijs
decipere *Genes. 3. 3. Reg. 22. Ioan. 8.* eas ad prodi-
tiones, rapinas, homicidia extimulare *Ioan. 13.*
Osee 4. & 5. illis adulteria, incestus & id genus
fæda flagitia inculcare *Luc. 4. Matth. 4. Act. 5.*
1. Corinb. 7. 1. Thessal. 3. eas cribrare ac tentare.
Luc. 22. Quicquid horum est, suo impingit
DEO Calvinus. ille potissima, potentissimaq;
caussa est omnis omnino humanæ deceptio-
nis; vt à quo omnis emanet efficacia erroris. *1. Inst.*
cap. 18. §. 2. ille fons & origo est vastationum,
bellorumque omnium: vt à quo appareat cer-
ta destinatione *Afyrios fuisse impulsos.* (*Ibidem*) ad
Iudæam igne ferroque vastandam; ille conci-
liator & perpetrator est vniuersæ infandæ li-
bidinis, vt qui detestabilem *Abfolonis incestum su-
um esse opus pronunciet.* Expressit omnia simul
nulla verborum vsus circuitione Princeps ac
primipilus Calvinianorum Zvvinglius *serm.*
de pron. Dei cap. 6. ad Cattozum Regulam scri-
bens: *Quando facimus adulterium aut homicidi-
um* (idem de alijs sceleribus est iudicium) *DEI*
opus est motoris, authoris, impulsoris, expressit ea-
dem Calvinizans Melanthon in *cap. 8. ad Rom.*
disertis verbis asserens: *adulterium Davidis &*
*proditio Iudæ, ita proprium est opus DEI; sicut vo-
catio & conuersio Pauli.*

Ratio 2.

Quia Deū
facit autho-
rē peccati.

2. Sed duabus è Caluino sumtis proposi-
tionibus hæc & breuius & non minus apertè
con-

concludamus. ait ipsemet; Libertinos in *In-*
structione contra Libert. cap. 14. eò quod DEVM
 astruant scelerum authorem, non tantum Dia-
 bolum cum DEO societate contingere; sed etiam in
 Deum ipsum transformare. Atqui ille ipse DE-
 VM astruit scelerum authorem cum scribit.
1. Institut. cap. 18. S. 3. Iam satis aperte ostendi, DE-
VM vocari omnium eorum (puta peccatorum quæ
peccata sunt, de quibus inibi agit) authorem,
quæ isti Censores (Doctores Ecclesiæ Catholi-
cæ) dicunt ocioso tantum eius permisso contingere.
 Transformat igitur etiam ipsemet DEVM
 suum suorumque in Diabolum. ut proinde
 sectatores eius culpari non debeant; quod
 vel in Gallia Parisijs in æde D. Medardi ru-
 brum in vitrea fenestra Cacodæmonem, di-
 ffecta Christi cruce reliquerint; vel in An-
 glia Londini, in templo D. Pauli solam Lu-
 ciferi imaginem reseruarint; vel Antuerpiæ
 in Belgio in primaria Basilica, Sathanæ sta-
 tuam, alijs euerfis exustisque retinuerint; vel
 Lugduni Batauorum reuertentes à diruto
 suburbano Franciscanorum Monasterio, pro
 Christi signo & vexillo aterrimum Dæmona
 suo agmini prætulerint. *Delrio lib. 3. Disq. Mag.*
par. 1. qu. 7. Sect. 1. Bredenb. lib. 7. cap. 38. Lindan. de
fug. ido. lib. 1. cap. 15.

Caluinia-
 norum es-
 ga Diabolæ
 religio.

3. P A T R E M. Et hic (quod erat necesse
 transformato iam DEO) in vitricum, in Ty-
 rannum, in Carnificem multis nominibus ac

Pater cele-
 stis Calui-
 no est car-
 nifex.

Ratio 1.
Quia Infe-
ros decet
nisi homi-
ni ante præ-
uisam cul-
pam.

modis à Caluino est commutatus. Primum e-
nim diu ante præuisa peccata omnia, atq; adeò
ab æterno, prius atrocem in humanum genus
tulit sententiam; quàm perspexerit causam.
prius sempiternis hominem adiudicauit in-
ferorum supplicijs; quàm vlla eius præuide-
ret flagitia. prius definiuit vniuscuiusque re-
probandi pœnam; quàm cognorit culpam.
*Homines, ait, Lib. 3. Instit. ca. 23. §. 2. nudo DEI arbi-
trio, citra proprium meritum, in æternam mortem
prædestinantur. & Ibid. cap. 22. §. 3. vbicunq; regnat
hoc DEI placitum nulla in considerationem veniunt
opera. Quid autem postea? vt hoc quod decre-
rat ad eum modum iniuste, videretur tamen
exequi iuste, non permittendo tantum habe-
nas laxauit malis spiritibus, ad hominem in
scelera quæque propellendum: verum etiam
vt id facerent, illis iniunxit. Scimus, ait, Lib. 1.
Inst. c. 18 §. 1. Sathanam se coram Deo sistere ad excipi-
enda iussa, non minus quàm Angelos: nec quid aggredi,
nisi volente DEO, cuius cum certo mandato mittitur,*

Deus Calui-
no peccati
est auctor
primarius,
vtens Dia-
bolo vt in-
strumento.

*vt sit Spiritus mendax in ore Prophetarum. ad cuius
nutum, potentiamq; respondet instrumentum magis
ipsius in agendo; quàm author. Lib. 2. Instit. ca. 4. §. 5.
Præterquam enim, quod iurato nostro hosti
mandat imbecilli homuncionis oppugnatio-
nem; eum etiam occulta quadam vi, in illo op-
pugnando, supplantandoq; adiuvat, adigitque
Sathanæ & peccato victas manus dare. Agit igitur
homolib. 1. Inst. ca. 18. §. 4. iusto Dei impulsu, quod
sibi non licet & in quo peccat, flammæq; mere-
tur æternas.*

4. Excusatum à peccato hominem putasset alius in eo, quod voluntatem suam voluntati ac impulsui conformasset diuino; vt cui nec debeat nec possit resistere. Sed nequaquam eum excusari apud DEVM permittit Caluinus. *Excusabiles, ait lib. 3. Instit. cap. 23. §. 9. peccando haberi volunt reprobi, quia euadere nequeunt peccandi necessitatem; præsertim cum ex DEI ordinatione sibi iniungatur huiusmodi necessitas. Nos verò inde negamus rite excusari. Ne verò quid deesset ad certam hominis perniciem & interitum; idem ille pius Calvinistarum Parens legem homini dedit; quam nec per gratiam DEI quantamcunque etiam, posset seruare. Hinc Caluinus: 2. Instit. cap. 7. §. 5. quod impossibile legis obseruationem diximus, id est paucis explicandum simul & confirmandum; In Antidoto Concil. Trident. sess. 6. mihi abūde sufficit neminem extitisse vnquam, qui legi DEI satisfecerit, nec vllum posse inueniri. Vt autē crudeliū posset deinde in transgressorem defæuire, minimis & leuissimis lapsiunculis desideriorum ac verborum inaniū, maximas & grauissimas pœnas æternæ mortis præfixit. Non est, scribit Caluinus, Lib. 2. Instit. cap. 8. §. 58. 59. quod vel leuissimas cupiditates (etiam omnem deliberationem antegressas) iudicio mortis eximamus. Quare habéant filij DEI (Caluiniani) omne peccatum mortale esse, quia est aduersus DEI voluntatem rebellio. Quis vnquam Vitricus, aut Tyrannus, aut Carnifex, si eiusmodi DEVS est PATER? Herodes, Nero,*

Ratio 2.
Quia ad
peccatum
necessitas.

Ratio 3.
Quia legē
impossibilem
dedit,
ne carnificinam
efugiat.

Ratio 4.
Quia mortis
iudicio
plectit
minima
peccata.

Caligula, Busyris, Mezentius præ hoc Calu-
nistico DEO quidam Mitiones fuere.

Deus Cal-
uino non
est omni-
potens.

5. OMNIPOTENTEM. Corrige hoc,
mutatisque litteris pauculis, vt consequen-
tia aptè nectantur antecedentibus, fac OR-
CIPOTENTEM. Præterquam enim quod
talem esse DEVM iam descriptum, est ne-
cesse; etiam apertè Deum omnipotentem
non esse Calvinus asseuerat. Non illi Deus

Ratio 1.

potest, licet extremum suæ potentie exerat,
licet sapientissimus DEI filius in cœna nouis-
sima, contrà quàm Caluino placuit, asserat
non tamen potest Christi corpus vel simul in

Ratio 2.

cœlis collocare, & constituere sub specie pa-
nis ac vini in terris; vel ita infra aut supra cœ-
los omnes reponere in spatijs vacuis, vt non

Ratio 3.

fit in loco, ac ambiatur à superficie corporis
continentis; vel sic præsens efficere augustis-
simo Sacramento, vt non æquetur; quantus
viro debetur, loco. *Cur non faciat Deus, aiunt*
apud Calvinum orthodoxi, 4. Instit. c. 17. §. 24.
vt caro eadē plura, diuersaq; loca occupet, vt nullo lo-
co contineatur, vt modo & specie careat? Respondet
autem Calvinus *Ibid. Insane cur à DEI potentia*
postulas, vt carnē faciat simul esse & non esse carnem?

Caluinistæ
qui hanc
potentiam
concedunt
Caluino
insaniunt.

nimirum, vt hoc Caluino DEVS efficere pe-
nitus non potest, ita nec ista. Vt exiret æterni
Patris filius Christus ex utero Virginis hunc
in mundum Virginali claustro non aperto.
vt prodiret è sepulchro lapide ad viam pate-
faciendam non diuulso. vt intraret ad Apo-

stolos

stolos cum fores essent clausæ ostio penetra-
to. denique vt cum triumpho beatas iniret se-
des cælo non perforato, tam non potuit præ-
stare Deus Caluino; *Infra in sequentibus articulis.*
quàm condere non potest hominem, qui sit
animal rationis expers.

6. Sed nihil hoc admirandum: siquidem
Caluianus Deus nō absolutam, sed depen-
dentem ordinariamque tantum habet poten-
tiam; idque solum potest, quod re ipsa vult fa-
cere & facit: id autem facere non potest, quod
non decreuit facere. *In Cat. breui ad art. 1. hinc
illud. 3 Inst. t. cap. 23. § 2. Neque commentum in-
gerimus absolutæ potentie, quod sicuti prophanum est;
ita merito detestabile nobis esse debet.* Respexit
ad hoc Beza contra Heshus. illud Gabriælis An-
geli ad Christi Matrem oraculum *Luc. 1.* Non
est impossibile apud Deum omne verbum:
*nec credendum, nec Vniuersaliter recipiendum con-
stanter propugnans.* Idem post Caluinum &
Bezam protestati sunt Parisijs in colloquio
Spina & Sureus: *Feu ardentius lib. 1. Theom.* Ca-
melum siue funem nauticum per foramen a-
cus transire posse pernegantes, ipsamque ve-
ritatem mentitam fuisse volentes, cum ait:
Matth. 19. apud homines hoc est impossibile,
apud Deum autem omnia sunt possible.

7. Quasi verò illi sit difficile panem in cor-
pus; vinū in sanguinē Christi Domini cōmu-
tarē; cui facillimum fuit, mulierem viuētem

Caluinus
Deo detra-
hit poten-
tiam abso-
lutam.

Transsub-
stantiatio-
nis possibi-
litas.

CREDO CAL-

Polytopie
possibili-
tas.

Localis ex-
tensio sepa-
rabilis est,
& quanti-
tate.

in salis statuam; *Gen. 19.* virgam Moysis in ser-
pentem; *Exod. 7.* aquas in vinum *Ioan. 2.* con-
uertere; ipsumq; nihil in cœlum, terram, om-
niaque alia ex nihilo facta transfundere, aut
quasi magis repugnet rationi, corpus vnū esse
in pluribus locis; quàm naturam vnā esse in
tribus personis, reapse distinctis à se inuicem,
sed non à natura; quam essentiam vnā Dei
sine sui multiplicatione esse totam in pluri-
bus simul mundis si forent, & totam similiter
in singulis eorū; quàm hypostasim vnā Ver-
bi diuini in duabus esse naturis perfectis dis-
simillimisq; , à quarum altera nihil sit re di-
uersum: quam animam hominis vnā, totam
esse in toto corpore, & totam simul in pluri-
bus, adeoque in omnibus partibus, tanquam
pluribus in locis, & nihilominus vnā in se
permanere, aut denique quasi à corporea mo-
le abiungere nequeat, vel ipsius per locum ac-
tUALEM extensionem, vel alterius corporis,
vt non sint simul duo, protrusionem; qui ab
humana natura in Christo intimam humani-
tatis subsistentiam, ab vndis maris rubri *Exod.*
14. & Iordanis *Iosu. 3.* hinc atque inde muro-
rum instar cōsistentibus, innatā ad ima de-
fluendi propensionem à securi ferrea *4. Reg. 6.*
& à B. Petri corpore super aquas hærente &
gradiente *Matth. 14.* subsidentis grauitatis ac-
tionem; ab igne fornacis Babylonicę *Dan. 3.*
puerorum iniectionum adustionem, *Luc. 4.* à
Christi corpore visibili ante & post resurre-
ctionem

Actonem Ioan. 20. omnem coloris ad circumstantium oculos diffusionem subtraxit, sustulitq;. Qui hæc & id genus alia potuit, quid est cur à quâtitate effluentem occupationem loci cohibere auferre; non possit? Iam **CREATOR** **COELI ET TERRAE**, reliquum est vt facias corruptorem. Sic enim iubet Caluini oraculum: *voluntate DEI quæ rerum est necessitas, cecidit Adamus, defecerunt Angeli.* *Lib. 3. Inst. c. 22. §. 8. 4. 6. 7.*

Deus Caluino corruptor cœli & terræ.

8. Ex dictis nullo iam negotio hæc deducuntur. 1. Articulus Calviniani symboli primum reuera hunc esse: **CREDO IN DIABOLVM, CARNIFICEM, ORCIPOTENTEM, CORRVPTOREM COELI ET TERRAE.** 2. Proinde longè alium esse **DEVM** Christianorum quàm Calvinianorum: quandoquidem nō sicut Calviniani, ita Christiani **DEI** potentia; sed patientia; nō impulsu & operatione; sed indulgentia & permissione peccata fiunt; vt eleganter B. Augustinus. *in Ioan. tract. 53.* 3. Probabilius tamen videri intelligentiores Calvinisequas, prorsus esse atheos, & cum Godefrido à Valle Parisijs exusto anno Christi 1272. potius credere nullum, quàm vllum talem esse **DEVM.** 4. Non referre, si quidē nullus sit **DEVS**, quem **DEI** cultū & religionem profitearis; Si iuratâ lingua mentem iniuratam geras; si cum Bucero ex Zvingliano fias Lutheranus; ex Lutherano Semicatholicus; ex Semicatholico Sacra-

Articulus Calvinianus.

Tituli hī prorsus Diabolici.

mentarius; ex Sacramentario Iudæus obdu-
ratus. Si cum Adamo Neusero Heidelbergensio
olim Pastore, cum Alamanno, Blandrata,
Statorio, Socino, Lismano alijsq; primis per
Sarmatiam Calviniani Evangelij Apostolis
transfugas ad Turcismum. cui nullus Deus
est, illi omnis religio perinde est: nisi quod
Mahometismus eò sit Calvinistis gravior; quo
& fædarum carnis voluptatum maior est ap-
probator, & doctrinæ Sacramentariorū con-
sonantior.

ARTICVLVS II. CATHOLICVS.

**ET IN IESVM CHRISTVM FI-
LIVM EIVS VNICVM DOMI-
NVM NOSTRVM.**

Calvinista 9. IN IESVM. Quid filio futurum est, v-
bi Pater vsque adeò est deturpatus? Caue ho-
noris causa ad nomen IESV caput apertas aut
genu flectas, sicut fieri consuetum est ad exi-
miorum Principum mentionem. Nam plus-
quam ridiculi Calvin. in c. 2 ad Philip. sunt Sorbonici
Sophista, qui ex illo Pauli; In nomine IESV flecta-
tur omne genu, &c. flectendum esse genu colligant,
quoties nomen IESV pronunciatur. Caue Iesum
dictum esse putes, quod ipse saluum facturum
esset populum, prout præmonuit cœlestis pa-
ranymphus Matth. 1. Nec saluavit nec perfe-
ctè saluare potuit mundum à peccatis. Ille e-
nim agnus est; non qui tollit peccatum mun-
di. sed tegit Ioa. 1. nō qui delet, abluir, mundat
iniqui-

Christus
Caluino
non est
Saluator.

iniquitatem *Psal. 50.* populi; sed inumbrat, conuelat, occultat, ne eam videat iam quasi cæcutiens *DEVS* Pater; nō qui consolidat, sanat, redintegrat *Ezech. 34.* quod per serpētem destructum est; sed emplastro tātum obducit, ne visum vlcus animę, vulnusq; suppurās nau-seam moueat. *Hac peruersitas* inquit loquens de *Christus* peccato, *2. Inst. c. 1. §. 8.* nunquam in nobis cessat. Et tollit à Calu-
 alibi. *Lib. 4. Inst. c. 15. §. 10.* Iam perspicuum est quā *uinitis.*
 falsum sit per baptismū solui nos & eximi ab originali peccato: ab his non abludit in antidoto *Triden-*
tini Concilij *sess. 5.* Manet verē peccatum in nobis, neq; per baptismam extinguitur. Sed ignoscēdum *IESV,* Si peccatum *Caluino* nō sustulerit, pro quo in solidum & ex assēiuitum redemptionis pretium patri deperdere non potuit. *Etenim* enim, ait, *2. Inst. c. 17. §. 1.* si quis simpliciter & perse *Christum* opponere velit iudicio *DEI,* non fore merito locum; quia non reperitur in *Christo* homine dignitas, que possit *DEVM* promereri, siue quod idem est, cui ex iustitia, ratione passionis infinite pretiosę, pater debeat remissionē delictorum.

IO. CHRISTVM. *Christus* idem valet q̃ vnctus: puta in Regem, cuius regni nō erit finis; *Luc. 1.* in Sacerdotē in æternum, secundū ordinem *Melchisedech;* *Psal. 109.* in Prophetā, in quo omnes thesauri sapientię & scientię *DEI* sunt absconditi, *Col. 2.* & super quē floris instar ascendēte de Iessę virga, requiescit *Spiritus Domini,* *Spiritus sapientię,* & intellectus, *Spiritus cōsiliij,* & fortitudinis, *Spiritus scientiæ,* & pietatis

CREDO CAL-

Christus
Caluino
est rex sine
regno.
Et Sacerdos
sine sacrifi-
cio.

Item Pro-
pheta sine
prophetia
& sapien-
tia.

ratis *Esaia 11.* Nihil minus, quàm talis Christus est Calvinianus. Rex ille est, sed cuius regni erit finis 2. *Instit. c. 14 §. 3.* temporale enim imperium ei à Patre mandatum est, donec facie ad faciem conspiciatur sit diuina eius Maiestas. Sacerdos ille est secundum ordinem Melchisedech; sed qui panem & vinum nunquam, ne quidem in nouissima cœna, post peractam consecrationem siue benedictionem obtulit 4. *Instit. cap. 18. §. 2.* Colligunt Romanenses, inquit, panem & vinum fuisse praludium Missæ suæ; ac si inter Melchisedech & Christum similitudo esset in panis & vini oblatione, quod magis ieiunium ac friuolum est, quàm vt resurrectione egeat. Propheta natus est; sed sine Sapientia, scientia, & diuinitatis, (magis coniunctæ humanitati Christi; quàm beatis in cœlo) visione. Palam est Caluino, in cap. 2. *Luc. 5. v. 40. & cap. 24.* communem Christo ignorantiam cum Angelis tribui. quare etiam ter & quater insanus ille in cap. 24. *Matth. 36.* foret, qui se grauatim ignorantia subijceret; quam ne ipse quidem DEI Filius nostri causa subire renuit, maximè cū ita ignoraret vt disceret ipse atq; erudiretur more hominum, Nicol. Gallasius in lib. 2. *Iren. cap. 49.*

II. Quid verò sub ferula Caluini didicit, quod ante nescierit? Per multa. Nam quod quidam existimant, in cap. 9. *Matth. v. 2.* Christum diuinitus conscius fuisse baiulantiū paralyticū fidei, quæ occultè intruſa latebat, (Caluino) coactum videtur. Nihilq; absurdi est, in c. 21. *Matth. 7. 18.* si dicamus secundum hominem speciem arboris fuisse illi in-

cogni-

cognitam; esto eam è folijs cognouisset, nō Salomon. vel Theophrastus tantum; sed etiam rusticulus aliquis è Iudæa. Ex nescientia hac interiore multiplices in verba Christi profluxere absurditates. vt sunt: responsio Christi ad Nathanaëlem in 1. ca. Ioan. v. 48. quæ parum videtur appositæ: sermo Christi ad Nicodemum de regeneratione qui longè petitus & intempestiuus videtur Ioan. 3. Similitudines diuersæ, quibus ad illustrandas res vtitur: Illa enim similis uero cribrandi non omni ex parte quadrat in cap. 22. Luc. alia, qua vñs est, apud eundem Euangelistam cap. 16. Luc. dura est & longe petita, quin etiam paulò durior est Metaphora, dum salem nominat in ca. 9. Marci. quicquid falsum est. Nec, quam adhibet apud Matthæum, in ca. 22. Matth. videtur quadrare partitio; quia propriè loquendo, dum officio defungimur erga homines, obsequium hoc DEO impendimus. Quantuscunque sit veritatis Magister vnigenitus Sapientissimus, cælestis patris. in Caluini schola Grammaticus est non bonus; Rhetor longè peior; sed omnium pessimus Dialecticus. probaturus namq; in ca. 9. Matth. Christus se peccata remittere, paralytici curati in corpore exemplo, Caluino videtur parum solide ratiocinari Christus. Occursurus calumniæ quod in Principe Dæmoniorum eijceret Dæmonia, videtur, ait, in c. 12. Matth. v. 25 parum solida esse refutatio. Infert Christus Matth. 7. omnia ergò quæcunq; vultis vt faciant vobis homines. Superuacanea est, ait, illatio. Deniq; hoc esto

*Christus
Caluino
malus Dia-
lecticus.*

è tri-

è tripode Geneuensi oraculum: Memoria tenendum est vulgo receptis prouerbijs, ita vsum esse Christum vt tantum essent probabiles coniectura, non autem solide probarent in c. 2. Matth. & Luc. 5. Videntur vt admirarentur turbæ (Caluinianæ) super doctrina eius; ca. 7. Matth. vt stupeant in doctrina eius, quia in potestate erat sermo ipsius; Luc. 4. vt suspiciant verba duodennis in medio Doctorum? Luc. 2.

12. FILIUM EIVS VNICVM. Credo pro filio priuignum, aut reum quempiam expectas; quando quidem Pater iam ante degenerauit in Vitricum & Carnificem. Certè Deus verè non est, qui Patri æqualis nō est. At Caluino Pater *per* *ἰσχυρὸν* & *per* excellentiam præ filio contra Gentilem in resut. protesis 10. & Instit. lib. 1. c. 13. §. 23. in scripturis Deus est. Pater primum; Filius secundum à Patre, obtinet imperij & honoris locum; Spiritus sanctus tertium. Calu. in c. 26. Matth. y. 64. Pater prima vitæ causa est; & primus gradus; Filius secunda; Spiritus sanctus tertia. Patris prima est potentia; Filij secunda; Spiritus sancti tertia. Calu. in c. 6. Ioan. & Mar. 13. Est Patris Vicarius in c. 22. & 26. Matth. Minister, Calu. in c. 17. Ioan. & Secretarius intimus in c. 1. Ioan. illō minor secundum diuinitatem. Quamquam enim ab antiquis, ait in admon. ad Polon sentētia Christi: Pater maior me est, restricta fuit ad humanam eius naturam: Ego tamen non dubito ad totum complexum (humanam simul & diuinā naturam) extēdere. Dicere Filium D E-

Christus
Caluino
non est
Deus.

VM de Deo, prout sancta Synodus Nicæna, *Christus*
est ὁ ἁγίος υἱός, in Syno. Lausan. & durè, & peri- quoad Dei-
culosè, & impropriè loqui Danaus cōtra Geneb. Quid tatē minor
ita? quia precariam tunc à Patre haberet Dei- est patre
tatem contra Gent. perfidiam. Haud aliter: ac si Caluino.
 quia Pater dedit vitam Filio Ioan. 5. itemque
 personam, ideo vitam personamque mendica-
 tō obtineat filius; & nō verius sit, per omnem
 generationem, naturam, essentiamque com-
 municari genito.

13. DOMINVM NOSTRVM. Vide & ri- *Christum*
 de Dominum hunc Calvinianum, 3. Inst. c. 24. Calvinus
 §. 13. vocem dirigit ad suos seruos, sed ut magis obsur- *ridiculum*
descant. lumen accendit; sed ut reddamur ceciores. facit,
doctrinam profert; sed quo magis obstupescant, reme-
dium adhibet; sed ne sanentur. Et licet hos inter
 seruos nō sint Calviniani, ut qui soli sint prę-
 destinati, & ob id vocē eius audiant; omnem
 tamen honorem & grati animi signū negant.
 Non licet cum reuerentię significatione san-
 ctum eius nomen *supranum. 9.* edicere, non ad
 eum preces suas, petitionesque dirigere: liqui-
 dem qui ad ipsam carnem Christi, siue Filio
 Dei hypostaticè vnitā suam adorationem aut in-
 uocationē dirigit, *is ex ipsius D-E I ore maledictus*
est. Latm. Danaus in exam. Kemnity. Nec verò Ma- *Christus*
 gi, quando procidentes adorarunt eum, cuius *Caluino*
 viderāt stellam in Oriente, aut illi aurū, thus, *non est a.*
 myrrhā, ut Regiisque, Hominiisque, Deoque dona tu- *doratus ut*
 lerunt, ipsum ut verum Deum coluerunt: sed *Deus.*
 tantū ut magni cuiusdam Regis Filio suum obtulerunt.

obsce-

obsequium Calu. in Harm. Nec Centurio qui se indignum censebat, cuius tectum subiret Christus, & cuius fides superauit aliorum fidem in Israel. *Calu. ibid.* nec cecus ille, qui voce *Ioan. 9.* professus se in Filium Dei credere, procidit & adorauit, eum adorando aliud significauit; *quam quod genu demisso, vel alio quodam signo honorem, obsequium, & alia beneuolentia signa alteri exhibenda indicauit.*

14. Ex his nullo iterum labore hæc corollaria conficies. 1. Calvinisequarum fidei secundum articulum toto distare cælo ab eo, quem tradiderunt Apostoli, & si cogatur ad aperti sermonis usum effici ter & amplius execrandū. ET IN NON IESVM. A CHRI-

Diabolus
religiosior
Caluinistis

STVM PRIVIGNVM VNICVM DEGENEREM. 2. Calvinianis paulò religiosorem esse Diabolum, vt qui ad nomen IESV Christi ex obsessis corporibus *Marc. 9.* facessat, filiumque Dei agnoscat, cum illi ne latum quidem vnguem, vel manu ad leuandum pileum sublata, vel poplite ad flectendum curuato se moueant. 3. Iure suo Calvinigenas Familianos in Anglia in *præf. lib. contra familiam amoris anno 1577. Lond. editi.* Frisia, Hollandia. Libertinos in Gallia, Flandria, Brabantia, VVestphalia. *Calu. contra Libertinos.* Seruetianos in Transylvania, Hungaria, Polonia negare Christum verum esse DEVM: sed tantum nudum hominem & philosophum datum humano generi *Sinlerus in præf. lib. de æterno Filio Dei.* vt sit

Christo
Deitatem
detrahunt
Caluinistæ

rectè

rectè viuendi exemplum, aut vt paulò maiora cum Melanthonē canamus, *Phil. in Locis com. Hallæ Ann. 1539. fol. 8.* in Christo non totum, sed aliquid esse diuinæ naturæ substantialiter.

ARTICVLVS III. CATHOLICVS.

QVI CONCEPTVS EST DE SPIRITU SANCTO NATVS EX MARIA VIRGINE.

15. Generationem eius quis enarrabit? ait *Isaias Cap. 53.* Enarrant eam Calvinistæ, putantq; Prophetæ verba (quicquid etiam contradicant PATRES veteres) non de Christi generatione: sed regni eius diutina propagatione interpretanda *Caluin. in Esa. ca. 53.* Enarrant autem hac ratione, vt conceptus quidem Filius sit, sed tamen videre non possint, quomodo simul cum Filio conceptus & incarnatus non sit Pater, cui vna cum Filio est essentia. *Friccius initio libell. de Mediatore.* Deinde, vt solus intelligatur conceptus Filius, vt tamen de cælesti gloria, quam habuit ab initio *Ioan. 17.* nihil deperdiderit per carnis nostræ assumptionem, non satis capit *Calvinus. Præposterum,* inquit, *in Ioan. 17.* Christi de reddenda claritate votum fore, si de sola humanitate intelligatur, non etiam de diuinitate. Vnde & à Melanthonē contra Stancarum, & alibi in epist. ad Elect. Brandeb. 12. Ianuar. anno 1553. data scribitur: Filius Dei secundum diuinitatem gloriam sibi dari & restitui

Conceptio
Christi
gloriam
minuit
Caluino.

erat ac postulat. Denique ut conceptus nil amiserit de gloria; informis tamen prius massa, & fetus extitit, qui more aliorum infantum in Virginis utero sensim, humanum coalesceret in corpusculum. *Quæ enim de momentanea factæ conformatione differuntur à Theologis, admirabilem vim, potestatemq; Dei omnipotentis operantis in Virgine supra naturam & ex purissimo eius sanguine Adamo secundo, in momento integrum corpus formantis, penficulantibus; ea Caluini Magistro in ca. 2. Luca Bucero sunt commenta. Nec verum est, quod ait ille Ioan. 1. Visum eum plenum gratiæ & veritatis; aut nō ad mensuram datum illi Spiritum. Sed vna cum ætate creuerunt etiam in Christo animi dotes. Caluinus in c. 3. Luc. v. 40. gratitatisq; Spiritus sancti donis auctus est. Quid? quod columbâ super Christum descendente. Primum redditus sit certior suæ vocationis, & ob id nona Spiritus sancti vñctione imbutus. In c. 3. Mat. v. 61. quod vberiore tum Spiritus virtute sit instructus, ut fortior foret ad obeundas pugnas.*

Christus
cum ætate
profecit
Caluino.

Christus
Beze ex
non virgi-
ne natus.

16. Iam verò Natiuitas sic habet, ut natus sit ex Maria non virgine. Reiecto enim Papistarum figmento, ait Molinæus in Harm. 4. Euang. part. 3. quod filius eius ut radus solis per vitrum, sic per vitrum illasum transiuit; dicendum & credendum est, quod naturaliter ruptis obicibus, id est claustro, & virginali integritate læsa, & apertis locis exiuit ac natus est; & quod diuulsis distractisq; vteri partibus (Beza contra Beze.) egressus sit. Proinde

non

non est quod miremur, si ex partu uti cætera mulieres in peccatis conceptæ, & concipientes, maledictioni Eux obnoxia; ita & ipsa benedicta Mater Iesu infirmata sit, eaque causa eius in Aegyptum fugâ Deus tantisper, dum è puerperio renalesceret, viresq; itineri necessarias repararet, distulerit. ut nihil diuinum cogitans philosophatur Caluinus in *Harm. ad c. 2. Matth.* Nec interest in fide Euangelica secundum Euangelium Beza in *præfat. noui Test.* (in quo nulla diu potest incorrupta virgo persistere) ut post Christum natum in Virginitate vixerit. illud scire precium est, quod non malignè minus Dei patientiam, quam Zacharias restrinxerit Calu. in *cap. 1. Luc. v. 34.* quod si ues sues saepe excefferit Calu. in *c. 12. Matth. & Luc.* quod in tempestinè festina fuerit; (*Ibidem*) quod superba Deo se prætulerit in *c. 2. Luc. in Harm.* quod quo tempore moriens in Cruce Filio ex ardentissimo amoris affectu astiterit, in primam, quintum, sextum, nonum Decalogi præceptum peccatis mortaliter (*Buny. in exercitio Christian.*) Prò! quàm beata iudicio Caluiniatorum vbera, quæ suxit Dei filius; quam gratia plena, & benedicta inter mulieres Mater Domini; quàm fecit genitrici suæ magna. qui potens est & sanctum nomen eius!

Beza in matrem Dei blasphemus.

17. Corollaria. P genuinum articulum Calvinisequarū hunc esse: **QUI CONCEPTVS SPOLIATVSQVE GLORIA EST DE SPIRITU SANCTO NATVS: EX MARIA** Tertius articulus Calvinisticus.

Turcæ me-
lius de B.
Maria quā
iſta
ſentiant.

NON VIRGINE. 2. Turcas multò ſanius
ſentire de hoc articulo; quā Calviniſtas. Eo-
rum enim Azoar 31. eſt: Omnium mulierum
optimæ Mariæ, ab omnibus intactæ, animam
ſuam Deus inſufflauit, & illam Filiumq; eius
manifeſtum gentibus miraculum poſuit. Et
Azoar 17. Maria nunquam aliquid mali, ſive
malitiæ operata eſt. 3. Calviniſtas fuſtuarium
apud Turcas non euafuros. Teſtis enim The-
uet lib. 8. Coſm. cap. 2. apud Mahumetanos hanc
conſtitutionem eſſe, vt ſive quis Chriſtianus,
ſive Maurus, ſive Arabs, ſive Turca Chriſtum
(illud verbum DEI) quem virtute Spiritus
ſancti à Maria Virgine procreatum credunt;
vel etiam ipſam Virginem, quam DEVS crea-
turis omnibus puriorem fecit & excellentio-
rem, blaſphemauerit, præter multam pecu-
nariam, ſexaginta fuſtuarij plagas ſuſtineat.
Nō ſit vel fuſtium copia ſatis ampla, vel ino-
pia è multis pecuniarum, ſi hæ poenæ intro-
ducantur in Chriſtianiſmum contra Calui-
nianos.

Fuſtuariū
à Turcis
merentur
Caluin.

EPIMETRA PRO XENIO.

CAluiniftæ ad Auguſtanam ſe referunt
confeſſionem; vt huius prætextu facili-
us tolerentur in Imp. Rom. ſed in eo ſolemne
ſuum obtinent, quod eſt credulo vulgo face-
re ſucū. Quod enim ad doctos attinet. norunt
iſtius anni 1530. confeſſiones Carolo V. Au-
guſto oblatas, quorum altera Lutheranorum,
alte-

altera Zvvinglianorum propria: sed hâc non tantum Catholici omnes; cum Imperatore & Electoribus *Acta Comit. Aug. Decr. Imp. Surius in comment. suo, an. 1530.* sed & Lutherani proscripserunt *Sleidanus in hist. sua eod. anno.* Melanthonis in epistola sua ad Martinum Lutherum, pridie D. Margaretæ, data Augustæ, anno dicto, verba sunt: Zvvinglius misit huc confessionem impressum typis, diceret simpliciter mente captum, De peccato originali, de usu Sacramentorum veteres errores renouat, de ceremonijs loquitur planè Helveticè id est Barbarissime, velle se omnes ceremonias esse abolitas, suam causam de cæna vehementer virget. Episcopos omnes vult deletos. adedò verò Melanthon & Brentius ab Augustanæ Confessionis mantelo Sacramentarios tū arcuerunt, ut professi sint, in literis ad Landgr. Hassiæ, se non posse Zvvinglianos, (a quibus quid dissident Calviniani?) inter Fratres admittere. Neq; ignoravit idem Calvinus. *Cal. epistola ad Bez. p. 524.* Et quid nobis, ait, Confessio Augustana obtruditur? quæ omnibus paulò prudentioribus semper displicuit Christianis. Idem Beza, Vermilius, Marlhoratus Possiacci in colloquio responderunt, cum articulo 10. de præsentia Christi vrgerentur, Zanchius in *Miscell. damnat artic. confess. Aug. 5. 9. 10. 11. 12. alijsq.* Lutherus *Lib. Dasß dicse wort* noch fest stehen/te. *Tom. 2. VVittenberg.* cum eos intra & extra, suprà & infra infessos & obsessos à Cacodæmonibus asseuerat satis suam sententiam aperit, quam Discipuli constabunt.

Confess.
August. re-
ijcit Cala.

Lutherus
Sacramen-
tarijs in-
festus.

CREDO CAEVINISEQ.

biliunt. Nam Ienenses lib. *Manifesta ex scrip. de-*
monstratio; &c. anno 1586. faciunt Sacramentari-
 os non Christianos, sed baptizatos Iudæos &
 Mahometistas. VVittenbergenfes lib. *de test.*
Peuc. p. 79. Exploratissimum est, aiunt, *Caluinum ex*
instinctu Satana Scripturas de Sanctissima Trinita-
te, de Christo & Arrianorum, Iudæorumq; imposui-
vis deprauasse, & ad impium Arrianismum & Ma-
hometismum viam complanasse. Riuander lib. *Lupus*
 Quo ducat *Excoriatus pellem ipsdem ouiculæ Christi de-*
 Calui- *traxit. Eorundem mentiendi libidinem &*
 nismus. *duplicitatem VVilhel. Holder. lib. Candor Calui-*
man. rectas surreptiones in vrbes & nidos Lu-
theranorum idem lib. Cuculus Calvinist. altè vo-
lantem stupiditatem idem lib. Asinus auis. VVil-
 helmus Holderus detexit. Hæc (vt videre
 est in Bello Euangelij Quinti) Con-
 fessionistæ Augustani de
 Calvinistis.

FINIS.

